

**Namminersulerutta sillimaniarnermut illersornissamullu politikki qanoq ittoq kissaatigarput aamma nunarsuarmioqatigiit akornanni nunanik allanik qanoq ittumik suleqateqarnissamut eqqarsaateqartoqarneranik apeqqutaqqat aallaavigalugu oqallisissiatut siunnersuut.**

(Inatsisartunut ilaasortaq Ane Hansen, Inuit Ataqatigiit)

**Akissuteqaat**

(Namminiilivinnermut, Nunanut Allanut Nunalerinermullu Naalakkersuisoq)

Naalakkersuisut Inatsisartunut ilaasortaq Ane Hansen, Inuit Ataqatigiit, apeqquteqaat aallaavigalugu oqallinnissamik sammisamut assorsuaq attuumassuteqartumut siunnersuuteqarneranut qujassuteqarfigaat.

Naak nunarsuarmi nunap immikkoortortaani eqqissinartumiikkaluarluta, nunarsuarmi nunap immikkoortuaniippugut aamma sakkutooqarnikkut pissaanilissuarnik naalagaaffeqarfiusumi, tassaniillutik USA illuatungaani Rusland. Apeqqut qanoq ililluta nunatta illersornissakkut isumannaallisaanikkullu qularnaarnissaa apeqqutaavoq pingaartoq Kalaallit Nunaat namminersortumi siunnersuuteqartup nammineq uparuagaatut, pineqartoq tamanna ullumikkut Danmarkimit isumagineqartarmat.

Ilisimaneqartutut piffissami maannakkut Illersorneqarnissamut Sillimaniarnermullu politikki akisussaaffiit ilagaat Kalaallit Nunaannit tiguneqarsinnaanngitsoq, taamaallaat tiguneqarsinnaasoq, naalagaaffittut namminersortunngornissaq toqqarneqarpat. Akisussaaffiit inatsisimmi tunngaviusumi § 19-imut ilaasutut isigineqarput, tamannalu aamma namminersornermut inatsimmut nassuiaatini erseqqissaatigineqarluni.

Taamaattumik akisussaaffik taanna Kalaallit Nunaannut namminersortumut tunngaviusumik inatsimmut immikkoortunngorsinnaavoq pingaaruteqartoq.

Tunngaviusumik inatsimmi nunap illersorneqarnissaa pillugu apeqqut ilaatigut malittarisassiuuneqassaaq. Tassani isummerfigineqassaaq, nunarput namminerisaminik illersorneqarnissamut sakkutooqalissanersoq, imaluunniit assersuutigalugu Islanditut naalagaaffinnik allanik nunap illersorneqarnissaa namminersortuunermillu illersuinissaq pillugit isumaqatigiissuteqassanersoq. Ilimagineqartariaqassaaq siunertaa tassaassasoq, nunatsinni suliniutit eqqissisimanissamik nakkutiginnittuussasut aammattaaq nunatta soqutigisai siuarsarniarneqassasut. NATO-mut namminersortutut ilaasortaasinnaaneq aamma eqqartorneqarsinnaavoq, tamatumunngalu ilanngullugu pissusissamisuuassaaq apeqqut eqqarsaatigissallugu sakkutuujusussaannerup eqqunneqaratarsinnaanera naleqquttuussanersoq.

Taamatutaaq pingaarnersuinissaq aalajangiinissarlu aningaasatigut pisariaqassaaq, pisariaqarluinnartussaammatami nunap isumannaatsuunissaata qulakkeernissaanut. Pissutsimmi aallaavigalugit annertungaatsiarsinnaammata.

Naalakkersuisunit pingaartinneqarpoq, apeqqutit tamakku Namminiilivinnissamut isumalioqatigiissitami oqaluuserineqassasut, tunngaviusumik inatsimmik ilusilersuillutik suliaqarnerminni ilanngullugit. Taamaattumik ullumikkut oqallinneq isumalioqatigiissitami oqallinnissamut isumassarsiorfittut iluaqutaasinnaassaaq.

Naalakkersuisunit oqallilluartoqarnissaanik kissaassilluta oqaluuserisassaq peqataaffigissavarput.